

**Tuesday, February 24, 2026**

**Time - 2:30pm - 2:35pm**

**AKASHVANI AIZAWL**

**REGIONAL NEWS UNIT**

**CM : ASSEMBLY**

Chief Minister Pu Lalduhoma'n ZPM kaihhruai sorkarin leiba a rul ti lova sorkar hmasa leiba a rulh sak tia sawi fo chu eptu MLA ten tha an tih loh thu an sawi.

Vawiin Assembly Session-a Hachhek bialtu MLA Pu Robert Romawia zawhna chhangin Finance department changtu, Chief Minister Pu Lalduhoma chuan sorkar-in leiba hnutchhiah a tum lo ti-a an sawi chu sum puk leiba (borrowing rulh bang, outstanding debt) sawina a ni lo a, an hnunga mi te rulh tura thil lo lei bat emaw sum awm si loa hna lo inthawhtir ve ringawt emaw avanga ba siam chawp (committed liabilities) sawina a ni a ti a. Heng leiba (committed liabilities) siamtu tam tak chu Budget provision awm si loa supply order issue te, work order pek te a ni ber tih sawiin, tun Sorkar chuan pumpelh a tum a ti a. Kum 2018 atanga sorkar hmasa leiba an insiamchawp (committed liability)- PWD-ah nuai sang 1, 287 an rulh sak tawh a, nuai 583 rulh hma bak an la nei a, PHE-ah nuai sang 4,842 an rulh sak tawh a, rulh hmabak nuai sang 5,801 an la nei a, P&E-ah nuai 182 an rulh sak tawh a, nuai sang 1, 262 rulh hma bak a la awm a ti a. Hetianga an tih zel chuan a hnulama sorkar te phur rit a ni dawn tih a sawi a. Hemi chungchangah hian Leader of Opposition Pu Lalchhandama Ralte bakah Congress MLA Pu Ngunlianchunga, leh MNF MLA Dr R. Lalthangliana te chuan sorkar hmasa leiba rulh chu sorkar awm tawh zawng zawng tih thin a nih avangin sorkarin leiba a rul ti lova sorkar hmasa leiba a rulh sak tia Chief Minister Pu Lalduhoma'n a sawi fo chu mawi lo an tih thu an sawi a, Leader of Opposition Pu Lalchhandama chuan mawhphurhna la in sorkarna an siam tawh angin, leiba rulh chu an mawhphurhna a ni tawh a ti a, Congress MLA Pu Ngunlianchunga pawhin "kan rulh sak" tih lai chu tute ba nge a rulh sak tih zawhna zawtin, sorkarin leiba a rul tiin sawi se a mawi zawk thu a sawi a, MNF MLA Dr R. Lalthangliana pawhin sorkar leiba rulh a midang mawhpuh zel chu sorkar hmasa te tih dan thin a ni lo tih sawiin, Chief Minister pawhin a sawi dan a thlak danglam chhoh zel a beisei tih a sawi a ni.



**CM : NABARD&SASCI**

Chief Minister Pu Lalduhawma'n sorkar kum kal mekah NABARD atangin cheng vbch 199.26 leh Sasci loan cheng vbch 2345.08 an puk tawh thu a sawi.

Assembly session a zawhna ziaka chhangin Chief Minister Pu Lalduhawma chuan tun sorkar kal mekah NABARD atanga sum an puk zat chu cheng vbch 199.26 vel anih thu sawiin hei bakah hian Sasci loan atangin cheng vbch 2345.08 an pui tawh thu a sawi.

Chief Minister chuan NABARD hnuai project tur te chu Department hrang hrangin an proposal neih te Planning & Programme Implementation Department (RDB) ah an thelthuh thin thu a sawi a, Research and Development Branch (RDB) chuan a tul anga an zir chian hnuah projects an pawm te chu High Powered Committee (HPC) on NABARD Meeting ah pharh leh thin niin Rural Development

a nihna anga hmasawna khairual thei tur ang berin leh NABARD hnuai allocation awm thei zat mil zelin Department hrang hrang sum puk te hi a sem darh thin thu a sawi bawk.

Hei bakah hian Chief Minister Pu Lalduhawma chuan sorkar kum kal meka Department hrang hranga sorkar hma post ruak hnawhkhahna tura Finance Department in pawmpuina a pek atanga Sorkar-in hlawh leh an hamthatna atana sum a sen belh tur hi kum khat atan Rs 11.25 crore vel nia chhut anih thu a sawi tel bawk.



## **CM : TAX DEVOLUTION**

Chief Minister Pu Lalduhoma'n India-a state 28 zinga Tax Devolution pung nasa ber zinga Mizoram a tel tih sawiin, Financial manangement a an tih that avangin lawmman tam tawk tak an dawng dawn tih a sawi.

He thu hi vawiina Assembly thutkhawma zawhna leh chhanna hunah sawiin, Finance Department changtu Chief Minister Pu Lalduhoma chuan India-a state 28 zinga state 9 chiahin Tax Devolution-ah a hma aia tam an dawng a, chung zingah chuan Mizoram telin, hmarchhak state zingah phei chuan Assam nen chiah an tel a, Tax Devolution punna zaa 23 vel nia a hriat thu sawiin, a sang hle a ti a, Delhi tlangah hmelhriat tha an nei ve lo chung a Tax Devolution pung nasa ber zinga Mizoram a tel chu Pathian Malsawma a nih thu a sawi bawk.



## **DP&AR MINISTER : PROXY EMPLOYEE**

Department of Personnel & Administrative Reforms (DP&AR) changtu Minister Pu K. Sapdanga'n sorkar hnathawk ai kal lak avangin mi 37 hrem an ni tawh a, an zinga mi 29 te service tihtawp a nih thu a sawi.

He thu hi vawiina Assembly thutkhawma zawhna leh chhanna hunah sawiin, DP&AR changtu Minister Pu K. Sapdanga chuan aikal lak avangin sawrkarin a thawktu mi 37 a hrem tawh a, chung zinga 29 te chu an service tihtawp an nih sawiin, midang 8 chu hremna tenau (minor punishment) pek an nih thu a sawi a. Aikal lak chu an ACR ah te ziah lan a nih thu sawiin, an service zel atan a pawl thei tih a sawi bawk a ni.

## **Byte : Minister Pu.K Sapdanga**

Minister chuan ZPM kaihhruai Sorkar tan tirh atanga kumin February ni 10 thleng khan sorkar hnathawk mi 2,648 ten promotion an hmu tawh a, tun Sorkar-ah Promotion tangkhang report dawn a awm loh thu a sawi bawk a ni.



## **DP&AR MINISTER : MSSSB**

DP&AR changtu Minister Pu K. Sapdanga Mizoram Subordinate Services Selection Board (MSSSB) thar thawh leh tumna a awm lo tih a sawi.

He thu hi vawiin Assembly Session-a zawhna leh chhanna hunah sawiin, Minister chuan tun dinhmunah MPSC chuan Group B Non-Gazetted leh a chunglam recruitment a khawih a, Department chuan Group C leh Group D recruitment a

khawih thung a ti a, nikum December thla atang khan Department ten hna an lak turah MPSC chuan exam zawhna a siam tawh tih sawiin, hei hian hna lak a ti fel hlea a hriat thu a sawi bawk a ni.

**Byte: DP&AR Minister**

Zawh belhna chhangin DP&AR Minister chuan District-a Deputy Commissioner Mizo tawng thiam lo dah an nih in District mipuiten harsatna an tawh fo thin chungchangah DP&AR chuan state dangte kalphung zawmin, state dang atanga hnamdang IAS junior lo kal, tualchhung tawng hre lo District a awm duh te chu Mizo tawng eng level chin emaw bituk neiin thiam tir hmasa turin ruahmanna a awm a, tihhlawhtlin ngei an tum thu a sawi bawk a ni.

